

BOLETIN INFORMATIVO TOKANTE ORDENANSA MANEHO DI NATURALES BONAIRE

Introdukshon

E boletin informativo aki ta trata Ordenansa maneho di naturalesa Bonaire i ta dirigí na suidananonan, kompanianan i organisashonnan sosial ku ta interesá pa sa mas di e ordenansa aki.

Huntu ku e ordenansa aki tin dos dekreto di ehekushon:

- e Dekreto maneho di naturalesa Bonaire;
- e Dekreto parke supmarino Bonaire.

Tokante kontenido di e dekretonan di ehekushon tin un seri di boletin informativo disponibel.

Protekshon di naturalesa riba tera i den laman

Protekshon legal di nos naturalesa ta urgente. Aplikando reglanan legal e isla ta keda atraktivo pa turista i Bonaire ta traha riba un desaroyo duradero. Esaki ta enserá ku no ta nos so pero tambe nos yunan por traha riba un bon futuro.

Riba 9 di òktober 2008 e Ordenansa maneho di naturalesa Bonaire a drenta na vigor. Ku e ordenansa aki Bonaire ta protehá naturalesa na tera i riba laman na un manera integral. Ta trata di protekshon di áreanan i sorto di para i bestia.

E ordenansa nobo ta trata pa diferente tratado ku ta protehá naturalesa ta haña aplikashon ku e influensha nesessario riba nos isla.

E ordenansa tin un kuadro hurídiko i prosedimentu ku ta nesessario pa duna e maneho di naturalesa realse riba nos isla. Si nos kuida nos naturalesa bon, e ta bon pa nos turismo, nos ekonomia i nos bienestar.

Kolegio insular a instituí na 1999 e maneho di naturalesa den e Plan di

maneho di naturalesa. Pa ehekushon di e plan mester tin lei i regla. Te ku 2008 tabatin solamente disponibel Ordenansa ambiente marítimo di año 1991.

Den e ordenansa aki tabata reglá protekshon di e parke supmarino i Klein Bonaire. Den e ordenansa tabatin tambe reglanan tokante piskamentu, i tokante Lac. Protekshon di áreanan di naturalesa riba e isla ta reglá segun leinan sivil. E ordenansa nobo pa protekshon di nos naturalesa ta sumamente nesessario i e ta obligatorio pa lei.

Parken natural

Konseho insular ta e instansia ku por instituí parkenan natural. Den un parke natural por apuntá diferente zona. Por ehèmpel zona pa rekreashon. Den Lac a instituí zona pa windsurf, kayak, snòrkel i pa landa. Pegá na e parke natural por destiná zona di protekshon ku ta un manera pa limitá influenshanan dañino ku ta tuma lugá pafó di e parke natural. Pensa por ehèmpel riba e influenshanan di konstrukshonnan riba e parke supmarino òf salvaguardiá un sitio manera Lac.

Gobièrnu ta manehá e parkenan natural. Kolegio ehekutivo (BC) por enkargá un organisashon ku e tarea di maneho. Riba nos isla Stichting Nationale Parken Bonaire (STINAPA Bonaire) ta esun ku tin e tarea di maneho.


Kolegio ehekutivo (BC) ta stipulá e plan di maneho. Den e plan tin pará medidanan pa konservashon òf rekuperashon de naturalesa òf balornan natural di e parke natural.

Den e ordenansa tambe ta reglá ku gobièrnu por imponé un kobransa riba e usuarianan. E entradanan di e kobransa ta bai pa e atministrador di e parkenan natural pa maneho di e parkenan.

Te na e momentu aki ta solamente e parke supmarino i Klein Bonaire ta denominá komo parkenan natural ku tin protekshon legal. Por ehèmpel parke Washington Slagbaai i e sitio di brui pa flamingo na saliña di sùit, ainda no tin un protekshon legal. E plan di maneho

pa naturalesa unánimamente aseptá na 1999 pa kolegio Insular ta hasi mension di e áreanan ku ta bini na remarke pa protekshon legal.

Karchi di áreanan di naturalesa protehá inkorporá den e plan di maneho di naturalesa (1999)



Bista general di áreanan protehá

Area	kategoria IUCN*
Pekelmeer	I Estriktamente reservá
Nationaal Park Washington - Slagbaai	II Parke Nashonal
Lac	II Parke Nashonal
Klein Bonaire	II Parke Nashonal
Bonaire National Marine Park (BNMP)	II Parke Nashonal
saliñanan	III Monumento Natural
kuebanan	III Monumento Natural
Brasil - Labra	IV Área natural insular
Paisahe di e terasa na parti meimei di Bonaire	IV área natural insular
Parti Sùit di Bonaire	IV área natural insular
Parke di paisahe Rincon	V Paisahe protehá

* IUCN = World Conservation Union (International Union for the Conservation of Nature).
Union Internashonal pa Konservashon di Naturalesa

Hopi di e naturalesa na Bonaire ta protehá pa tratadonan na kua Hulanda òf islanan BES ta mará. Akuerdo

Ramsar ta protehá áreanan nótiko: Lac, Saliña di sùit, Klein Bonaire i saliñanan di Slagbaai.

Sorto di bestia i matanan

Ku e ordenansa nobo kolegio ehekutivo (BC) por denominá tambe e sorto di bestia i matanan ku ta meresé protekshon. Ta prohibí pa piki, ranka, hasi daño òf destruí e sorto di matanan ei. No por molestiá, kohe, bende òf mata paranan protehá. Nèshi i webunan di e tipo di bestianan ei tambe ta protehá. Tokante sorto di bestia i matanan protehá tin un boletin informativo apart disponibel.

Kolegio ehekutivo (BC) por stipulá regla tambe pa e bestia i matanan ku no ta protehá. Por ehèmpel ta stipulashonnan tokante yagmentu òf kohementu di bestia. Ademas tin regla tokante kapmentu i rosamentu di palu . Bou di sierto kondishon kolegio ehekutivo (BC) por duna dispensashon na loke ta ordená òf prohibí.

Na Bonaire tin hopi sorto di bestia i mata protehá pa diferente tratado. E ordenansa ta menshoná e siguiente tratadonan .

- Tratado di biodiversidat:
Tratado tokante diversidat biológiko;
- Konvenio Bonn:
Tratado tokante protekshon di paranan migrante i sorto di bestia ku ta biba den naturalesa;
- Tratado CITES:
Akuerdo relashoná ku komersio internashonal den sorto di bestia i matanan menasá ku ta biba den naturalesa;
- Tratado di Ramsar:
Akuerdo tokante áreanan nóutiko ku tin nifikashon internashonal. En partikular pa paranan ku ta biba den e áreanan aki;
- Protokòl SPAW:
Protokòl enkuanto áreanan spesial ku tin protekshon i bestia i matanan ku ta biba den naturalesa ankrá den e tratado ku ta enserá protekshon i

desaroyo di e ambiente marítimo den área Karibense;

- Tratado di turtuga:
Tratado Inter-Amerikano tokante protekshon i konservashon di turtuganan.

E tratadonan aki ta duna protekshon na entre otro, lora, pelikan, flamingo i warawara. Tambe pa medio di e tratadonan aki tur turtuga, bayena i dòlfein tin protekshon.

Pa mas informashon lesa e boletin informativo tokante bestia i matanan protehá.

Reportahe tokante efekto riba medio ambiente

E ordenansa ta kontené e base legal pa ehekushon di un reportahe tokante efektonan riba medio ambiente. Kolegio ehekutivo (BC) por apuntá aktividatnan pa kua ta obligatorio kompilá un reportahe tokante e efekto riba medio ambiente.

Tin boletin apart ku ta trata e reportahe tokante efekto riba medio ambiente

Komishon maneho di naturalesa Bonaire

E ordenansa maneho di naturalesa Bonaire ta stipulá ku ta nombra un komishon maneho di naturalesa Bonaire. E komishon ta konsehá kolegio ehekutivo (BC) en general tokante apuntashon di áreanan natural, protekshon di naturalesa i maneho di naturalesa. Tin bes e konseho di e komishon ta obligatorio. Miembronan di e komishon ta apuntá a base di nan konosementu profeshonal.

E komishon maneho di naturalesa Bonaire ta na lugá di e anterior komishon ambiente marítimo. Tokante e komishon tin un boletin informativo apart.

Daño i perhuisio

E ordenansa ta kontené regla tokante e posibilidat pa paga daño i perhuisio òf

gastunan a konsekuensia di a apuntá un área komo parke natural òf un zona di protekshon òf dor di kondishonnan stipulá den un plan di maneho.

Pèrmitnan

E ordenansa maneho di naturalesa Bonaire ta kontené tambe stipulashonnan tokante prosedimentu pa risibí e pèrmitnan ku kolegio Ehekutivo (BC) a base di e ordenansa aki ta otorgá. Tokante e prosedimentu aki tin un boletin informativo apart.

Sanshonnan

Sanshonnan riba violashon di e reglanan no ta pará den e ordenansa, pero nan ta den leinan di pais. E kastigu di prison pa violashon ta maksimal un aña òf un but di maksimal \$ 56.000,- òf tur dos. E kastigu di prison maksimal pa

un krímen intenshonalmente ta kuater aña òf un but di \$ 560.000,- òf tur dos.

Boletinnan informativo

Tokante e Ordenansa maneho naturalesa Bonaire tin e siguiente boletinnan informativo disponibel

- Ordenansa maneho di naturalesa Bonaire
- Prosedimentu pa pèrmit segun Ordenansa maneho di naturalesa Bonaire
- Pago pa uso di parkenan natural
- Kompanianan di deporte nótiko
- Bestia i matanan protehá Bonaire
- Palunan protehá
- Piskamentu riba ref
- Reportahe riba efekto riba medio ambiente
- Komishon maneho di naturalesa Bonaire

NOS NATURALES TA NOS TESORO!

E boletin informativo aki ta kontené un reprodukshon kòrtiku i liber di e disposishonnan legal. Den kaso di un konflikto bo no por basa bo mes riba e publikashon aki. Den un kaso asina konsultá semper e leinan i e areglonan.



Kolofon:

Boletin informativo Medio Ambiente i Naturalesa nr. 1210 02 P
desèmber 2010

Identidat Públiko Bonaire
Dienst Ruimtelijke Ontwikkeling en Beheer
Sekshon Medio Ambiente i Maneho di Naturalesa
Kaya Amsterdam 23
Kralendijk
Tel: 717 - 8130
Faks: 717 - 6980

www.bonairegov.an